

2 Timoti

O

Sansandek gigerta Pol in Timoti amen mar tonan lahta

Gamuk ameb lehaqta

Pol ame gigerta uliq Rom-ub irquran osad in Timoti amen sansandek ka mar tonim eman leh ug. Kam nab Pol afaqan kabemmo soryaq. In aholyogniz asor God ago kabi y emnan haqad hulosisim lehsa in amomo osyaq. Ossa mat amulik-mulikmo bo Pol ahol waqsa bunmo in Pol aholib hiqiy yaqay. Hiqiysa Pol ago hazizir amebta nab in amomo iyim tur. Teq in ago hazizir na le a hi dimniyan in anad tiqemyaq, Muran Rom mataw ka ya inol emid ya tumoqdaiq haqyaq. Nazaq iyan in Timoti bulonid agerab hidmo tuboldaq haqad in amen gamuk ka eman lah.

Timoti in Pol inaq kabi y agaribmo emsa Pol in Timoti loyinsa in ago amun diqta nog iyyaq. Nazaq iyan luweq in irquran osaqta na ago Timoti anad meqniy hasdaq haqad in gamuk awaz meqinta kazaq bulon, Timoti, ni ninad helmota na hi hulosisad ni Yesus Krai s ago wagam dimunta bilaqta na ni waz naqmo hiqiy ham. Ni God ago gamuk na bunmo muzin bugsa mataw afaqan nigad santitiy nigs na zaway diq iyeq God kabi y nigta na ni emmo em ham.

Pol anad emyaq, Ya moqid teq Timoti in yaqgo ban waqeq God ago kabi y ka em tuteq ad tilehdaq haqyaq. Haqad in Timoti bulonim bilam, Kabi y ka God-mo agota iyan in wamuzsa in a hikidik woqdaq ham. Sa mataw i gisan ka wol emid moqsa i giwitan le God inaq kuluwa-kuluwmo ginad dimniysa osamta ham. Nazaq iyan Timoti ham, ni ya isen muzinad helmo haqad nidan sosil hi iyan ham. Ad teq ni nigem kiskismo ussa ni mataw ginan ninad bilaqsa afaqan bunmo sor ham.

Timoti aholtuw bulad God ago kabibiy matmo diq iydaq

1 ¹Ari yaqmo Pol. God-mo anad bilaqan ya Kraiſ Yesuſ ago Aposeſ iyta. Ya on mataw gibilensa in oſ dimunta God negnan hel diqmo bilamta na ago hurit kem daqay haqad God in kabiy na ya ibenab amta.

²Timoti, ni yaqgo amunmo diq nog iysa ya ni ninan inad bilaqaqta. Ya ninmen gamuk ka mar tonim eman leh nigaq.

I Gimam God teq i gigo Iyahta Kraiſ Yesuſ inaq in gigem dimunta nigad in ni ninan ginad meqniysa ni nigem midemeqmo usan.

I Yesuſ awagamun dimunta ago gimebay hi woqan

³Ya isesan God abin wazinad ayon lotu em yaqayta nazaqmo ya emaiqmo. Emad ya igem loyinsa in God ameb dimun diqmo usaq. Timoti, taromab teq zeqab inaqmo ya God inaq gamuk emad ya ni ninadin emad God esey ugaiqta. ⁴Ad ya nihulosim lehſa ni nimeqil womta na ya anadin emad ya a ta nibiynan inad diq bilaqaq, ya nibiyeq teq inad tidimniydaq haqad. ⁵Teq ni nimileq a hi iyad Kraiſ anan helmo diq haqaqta na ya anadin emaiq. Kwaziqmo ni niſes Lowiſ teq ni ninen Yunis in helmo haqad osiyta. An ya inad emaiq in ginad nog ni ninad usaqmo haqaiq. ⁶Nazaq iyan kwaziqmo ya iben niholib emim niwazſa ni God ago naw wamta na ni anadin emad akabiyan waz ta eraqſa in niholib ayahmo diq usan. Bilaqne faq miynan tonsa mat ulam haman amileq a ta eraqaqta nazaq nog. ⁷Ni ninad em. God in ago Bugaw igan Bugaw na i giqemid i mataw girabungo a haiqta. Haiqgam. Bugaw na i giqemid i zaway diq iyeq osad i on mataw ginan ginad bilaqſa i gigo luw oſ anononmo wamuzam haqad in ago Bugaw na igta.

⁸Nazaq iyan ni i gigo Iyahta awagamun ulalab bilaqnan nimebay hi woqan. Ad ya Iyahta ago kabiy emſa mataw ya iwazim iqirquran ya kawa osaiqta na ago ni nimebay hi woqanmo. Haiqgam. God zaway nigſa ni ya inaq araقيبmo Yesuſ awagamun dimunta akabiyan emad i araقيبmo afaqan soruq. ⁹I God ago on mataw tawonta iyeq osam haqad in i gililewunim aholyon giwamta. Teq i kabiy dimdimunta emſa in i gibiyad giwamta nazaq a haiq. In anadibmo agem dimunta samanmo igad in i gilumsihim giwamta. Kwaziqmo diq in og ka eman a hi gwahtiſamo in anad tiqam, Ya on mataw iholyon giwaqdaiqta na inad negad ya Kraiſ Yesuſ ago kabiy amalib tigilumsihdaiq ham. ¹⁰Haqan muran mat i gilumsihim giwaqaqta amatin Kraiſ Yesuſ-mo bo tugwahtiſim in God anad bilaqan uſta na eman ulal tiſiy. In bolim moq ago zaway walemim teq in oſ dimunta kuluwa-kuluwmo osayta na ago dante eman ſaw anuwanib tugwahtim. An on mataw Yesuſ awagamun dimunta huritim anan helmo tihaqayta na in dante na ahol waq kemayta.

¹¹Ya Yesuſ awagamun dimunta naqmo waqeq a le og ſaw haresmo bilaqdaiq haqad God ya itowun eman ya in ago Aposeſ iyta. Iyim ya in

ago gamuk na asuleqin on mataw negad luwaiqta. ¹²Daq alulin naqmo ago ya kawa santitiy waqad osaiqta. Teq ya imebay a hi woqaq. Na ezaqgo ya mat anan helmo haqaiqta na ago ya tuhurit has. In kabiya dimunta ya ibenab amta na inmo wamuz naqmo hiquisa yaqgo kabiya na dimunmo ussa le Krai Yesu ta boldaqta na akaman tugwahtiqaq.

¹³Ya suleq dimunta nibilenta na ni anadin emad tuteqmo ni suleq na adan emad os. Osad ni Krai Yesu asen muzad ni God anan helmo haqad teq ni on mataw ginan ninad bilaqan. ¹⁴God ago Bugaw Dimunta i giduganib usaqta na in nilumsihsa ni God kabiya dimunta nibenab amta na anononmo wamuzsa in hi woqan.

¹⁵On mataw saw Esiya-ibta na bunmo gileh tiyagiy. Ad in gilikmanib mataw giger Figelus ayow Hermogenes inaq tiqihulosiymo. Na ago ni tuhuritta.

¹⁶⁻¹⁷Teq ya Onesiforus asenlulniz gimen Iyahta bulonaiqta, in mataw na ginan anad meqniydaq haqad. Na ezaqgo ya iqrquran kab ossa Onesiforus in ya iben am waziya ka ago amebay a hi womta. Haiqqam. In uliq Romub kab bolim in aholtuw bulad inagunad luwim le in bo ya tiqibiyta. In sirisirimo bo ya ibiysa ya igem hastitaysa zaway muturta waqyaiq. ¹⁸Nazaq iyan ya inad awaz meqin amalib Iyahta kazaq bulonaiq, Iyahta haqaiq, kam abebtanta nab ni Onesiforus anan ninad meqniyan haqaiq. Teq mat na uliq Efesus-ib ame kabemmo ya ilumsihtamo. Na ago ni tuhurit kamta.

Timoti in Krai Yesu ago bab mat dimunta iyeq osan

2 ¹Ari yaqgo amun Timoti, Krai Yesu agem dimunta nigad nilumsihaqta na ni anadin emad ni niwaz meqniyeq os. ²Ad ningo walmataw gilikmanib ni mataw asor gituw inaqta ginagun. Ginagunad gibiyeq teq ni gamuk kwaziqmo ya mataw kabemmo gimeb nibilenan ni huritta na agamukan bunmo ni mataw na neg. Negid teq in gamuk na asuleqin tuteq in gigo walmataw gibileniymo.

³Teq ni Krai Yesu ago bab mat dimunta iyeq osad ni santitiy sor, i bunmo Yesu ago kabiya emad santitiy sorauqta nazaqmo. ⁴Mat bab emaqta na in kabiya haresmo mataw uliqabta emayta nagan in a hi emaqta. Haiqqam. In ago ayahta anad muzinad in ago ayahta kabiya anan anad bilaqta naqmo amomo in emaqta. ⁵Teq mat sibtitayim ameb le towub gwahtiqaqta na in anadibmo a hi sibaqta. Haiqqam. In daq na ago agununin muzinim sibaqta. Ari in gunun nagan itiyoneq in ago naw na a hi waqdaq. ⁶Teq mat aholtuw bulim kabiya didaq layta naqmo in kabiya ame waqim neqaqta. Mataw hares in didaq ameta na waqim a hi neqayta. ⁷Gamuk naway na ni anadin emsa Iyahta teq ninad emid hastitaydaq. Hastitaysa ni gamuk ezeqman na alulin bunmo ninad tiqem hasdaq.

⁸Tuteqmo ni Yesu Krai anadin em. In Devit asenlulib gwahtiqim in moqim teq ta eramta. Ya Yesu awagamun dimunta nazaqmo bilaqaiqta.

⁹Teq ya wagam dimunta na bilaqsa mataw ya inan mat meqin haqad in afaqan amo amo yagim le tiqiqirquriy. Bilaqne ya gavman gigo gunun itiyonim daq meqinta emta nazaq. Ta teq in God ago gamuk irquireq a hi wasih daqay. ¹⁰Nazaq iyan ya on mataw God gilumim aholyon giwamta na ginadin emad ya ituw a hi hiquysa afaqan ka bunmo soraiqta. Sorad ya inad emaiq, Ya God ago on mataw na gimen afaqan ka sorsa teq in le ban dimunta Krai Yesu in gimen wastitayan usaqta na waqeq in God inaq ginad dimniysa kuluwa-kuluwmo tuqos daqay haqaiq. ¹¹Teq gamuk araq ya nibilendaiqta ka in hel diqtaqmo.

I Yesu Krai inaq moqeq teq i inaq kayeqmo tuqosam.

¹²Ad i afaqan sorad gituw a hi hiquysa teq i inaq araqibmo king iyeq tuqosam.

Ari i gileh ugsa teq in i gileh tiqigdaqmo.

¹³Teq i ginad buliyeq i gigo gamuk helta in bulonta na i a ta hi muzinsa in i gigo hib daq nazaq a hi emdaq.

Inmo gamuk helta i gibilanta na tumuzin tutdaq.

Na ezaqgo inmo ago gamuk in bilamta na in a hikidik hulosdaq.

Timoti atuw bulad God ago kabibiy matmo diq iydaq

¹⁴Tuteqmo ni gamuk nawa ya teko nibilenta na ningo on mataw ginadib emsa in anadin emad osiy. Ad ni God ameb in gidek wazad gamuk atoranmo gibilensa in gamuk amikmikta aqanan hi mugiy. An mug nazaq na in mat araq a hikidik ulumsihagta. Haiqqam. Mataw nazaq an mugsu mataw ta asor gamuk meqinta na huritad in ginad dimunta usaqta na timeqniyaqta.

¹⁵Ni niholtuw bulad God ago kabiy emsa in ni ninan anad dimniyan. Ad ni on mataw in ago gamuk helta asuleqin negad ni gamuk na alulin anonon ninad em hasadmo in gibilen. Ni nazaq God ago kabiy wastitayeqmo emad teq ni in ameb turad ningo kabiy anan nimebay a hi woqdaq. ¹⁶Teq ni og ka ago gamuk samanta God abin wazan woqaqta na bunmo gileh ug. Mataw gamuk naqanta bilaqad oseq in God anad huloseq daq meqinta haresmo emsa le daq naqmo ayahmo diq in gilikmanib tuqusdaq. ¹⁷Ussa in gigo gamuk meqinta na on mataw kabemmo giholib lehdaq, bilaqne mat aholib asulan meqinta gwahtiqim lilihim ban bunmo waqaqta nazaq nog. Mataw giger Himeneus ayow Filetus inaq in gamuk naqanta bilaqayta. ¹⁸In giger gamuk helta ago dante tuhulosim in bilaqay, Mataw hodhodab eraq daqayta akaman na tekomo tugwahtim haqayta. Abeb mataw moqeq in a ta hi eraq daqay haqayta. Haqad in mataw asor ginad helta walebolsa in ginadnad tiqemayta.

¹⁹Teq God ago gamuk awaz meqniyim usad ahol a hi buliyaqta. In bilaqne tituq araq zawayta tileyan turaqta nazaq nog. Teq tituq na ahulib gamuk giger mar tonan usaqta na gigo araq in kazaq bilam,

Iyahta in ago on matawta na gigo tuhurit ham.

Teq ta araq na in bilam,

On mataw Iyahta ahagenib iyim abin wazinayta na bunmo in daq meqinta gileh ugiy ham.

²⁰Ni ninad em. Bit araq ayahtab reb deg teq yuqsan amo amo giqusaqta. Nagah na asor gol teq silva amalib giqemiya. Teq asor ayib sisoqiyta teq asor og soskaqib giqemiya. Nagah na asor in kabiy dimdimunta emgo giqusaqta teq asor in kabiy meqmeqinta emgo giqusaqta. ²¹Nazaq iyan on mataw in giholib daq meqinta ya ginan teko nawa tibilayta nagan suhol bugeq in bilaqne gog deg dimdimunta amalib kabiy dimunta emayta nazaq nog tiqiy daqay. Iyeq in bit anamren na amomo agota iysa in giwazza in aben inaq diq tiqiy daqay. Sa bit anamren na in gimalib kabiy dimdimunta emgo haqad wastitayeqmo gigo banab giqemdaq.

²²Nazaq iyan mataw minminta gigemab ginad meqinta gwahtiqaqta nagan ni gileh ugad tuk. Tukeq ni on mataw gigem anumlan haiqmo osad in Iyahta ahagenib iyim anan biyayta naqmo nenaq luwad ne bunmo God-mo ago daq titnonta muzinad luwi. Ad ni mataw dimunta na nenaq God anan helmo haqad ne an anan ginad bilaqsa zib alowabmo osiy. ²³Teq mataw nan agadanta bilaqsa in gilikmanib an mug alulin haiqta gwahtiqsa ni gamuk na asor hi bilaq. Mataw gamuk naqanta bilaqad in gigem meqniysa an haresmo wadayta. Na ago ni tuhuritta. ²⁴Iyahta ago kabibiy mat in mataw nenaq an a hi mugdaqta. Haiqqam. In mataw bunmo gilowan tondaqta. Teq in ago walmataw God ago suleq gibilen sireqsa mataw ta asor in gihar ugsa in mataw na gigo afaqan sorad a hi ginadaqta. ²⁵⁻²⁶Haiqqam. Mataw na in ago gamuk othassa in kiskismo ginad wastitaydaqta. Mataw gamuk othasayta na in Satan ago dobub woqan Satan in giwazim giqeman in anad muzinad daq emayta. Teq Iyahta ago kabibiy mat na in mataw naqanta kiskismo giwastitaydaqta. Na ezaqgo luweq God in mataw na gilumsihid in ginad tubuliy daqay. Ginad buliyeq gigo daq meqinta gileh ugad teq in God ago gamuk anan ginad em has daqay. Ginad em haseq teq in Satan ago dob bayid woqsa asanib gwahtiqeq osad in ginad hastitaysa dimunmo tuqos daqay.

**Kam abebtanta na bo sinsin tiqiysa teq on mataw
daq meqinta kabemmo em daqay**

3 ¹Ari ni ninad em. Kam abebtanta na tubolsa afaqan meqmeqinta kabemmo kazaq tugwahtiqdaqta. ²Mataw in gimo gihol anadin

emad mani kabemmo waqgo ginad em daqayta. Teq in gihol abin iluwid eraqsa in igmo ag haqad nan meqinta haresmo bilaq daqayta. Teq in ginenmaman giquez othas daqayta. Teq on mataw in gimen daq dimunta emsa in ginad dimunta a hi neg daqayta. Teq in God gileh ugad daq anumlan inaqa naqmo emad os daqayta. ³Teq in mataw amota meqin diq ossa gibiyad in ginan ginad a hikidik meqniydaqta. Teq in mataw ginan gigem meqniyad in ginad na a hikidik buliy daqayta. Teq in mataw gigilehunan bilaq daqayta. Teq in giholmo in ginad wamuzdaqta. Teq in gimot meqniysa in mataw haresmo gimeqin ton daqayta. Teq in God ago daq dimunta na bunmo geg ug daqayta. ⁴Teq in giyogniz kat negeq giwaqeq bab gibenab giqem daqayta. Teq in ginad hi emta adan muzinad bilaq daqay, Igmo asittaqqmo haq daqayta. Teq in ginad dimniysa osnan ginad bilaqsa in God anan ginad a hi bilaq daqayta. ⁵Teq in mataw kat negad God ago daq akabiyakinmo em daqayta. Ta teq in God ago zaway anan helmo a hi haqad in asit diq a hi loyin daqayta. Nazaq iyan ni mataw naqanta girabunad pesanmo luw.

⁶Na ezaqgo mataw na gilikmanib asor in le on ginad haiqta na gigo bitab gwalim kat negad ginad wamuzayta. On naqanta gigo daq meqinta kabemmo giholib usad iyan in ginad soqotim usaqta. Sa in gihol gigem eraqsa in muzgomo iyayta. ⁷On na tutimmo suleq dimunta huritayta teq gamuk dimunta na ginadib lehim in soqotim a hi usaqta. Nazaq iyan in gamuk helta na anan ginad a hi em hasayta.

⁸Mataw nawa daq meqmeqinta nazaq emayta na in gamuk helta bab ugayta, kwaziqqmo Janes ayow Jambres inaq in Moses bab ugiyta nazaqqmo. Mataw na ginad meqinta ayahmo ussa in katiyad God anan helmo haqayta. ⁹Ta teq in gigo daq na ayahmo diq a hi gwahtiqaq. Haiqqam. In gigo daq agadanta na gwahtiqaqsa mataw bunmo ahol tuwaq kem daqay. Kwaziqqmo Janes ayow Jambres inaq daq agadanta emsa on mataw ahol waq kemiya nazaqqmo.

Timoti in God ago gamuk waz naqmo hiqiydaq

¹⁰Ari ya ninaq luwad ya on mataw God ago suleq gibilensa ni tuhurit bugta. Ad ni yaqgo daq bunmo ahol waqad ya iholyon dan emim muzaiqta na ago ni tuhuritmo. Teq ya God anan helmo haqaiqta na teq ya ituw a hi hiqiysa kabiy emaiqta na teq ya mataw ginan inad diq bilaqsa ya afaqan sorad ihol a hi hureq hasaiqta na ni ahol tuwamtamo. ¹¹Teq ya God ago kabiy emsa mataw imeqin ton yaqayta na ago ni tuhurit. Antiyok-ib teq Aikoniyam-ub teq Listra-ib mataw santitiy meqin diq yagiya na ago ni tuhurit bug. Uliq nab mataw imuzad imeqin tonsa ya afaqan ayahmo sorta. Teq Iyahta ilumsihsa afaqan nagan a hi inol am. ¹²Helmo, on mataw Krai Yesu aholib soqoteq in God ago daq dimdimunta emad luwsa mataw tigimeqin ton daqay. ¹³Sa mataw ginad meqinta usaqta na teq

mataw katiyayta na in daq hihiq emad oseq in daq meqinta mebmemo em yaqayta na uriyamad in ta daq meqin diqta tiqem daqay. In on mataw kat negad teq in gimo nan katiyta anan helmo tihaq daqaymo.

¹⁴Ari Timoti ninmo nazaq hi em. Haiqqam. On mataw gamuk helta asuleqin nibileniyta na gigo tur os ni anadin emad ni suleq in gigo hib huritim anan helmo hamta naqmo ni muzin tut. ¹⁵Teq kwaziqmo ni amunib osad ni God ago mar tawonta na bunmo huritad osim bo muran kawa tiqiy. God ago gamuk naqmo in Krai Yesu anan helmo haqgo adan niqisihunaqta. Nazaq iyan ni gamuk na muzinsa teq God ni nilumsiheq tiniwaqdaq. ¹⁶God ago marib gamuk usaqta na bunmo God ago Bugaw inmo eman gwahtimta. Nazaq iyan gamuk na ayahmo i gilumsihaqta. Gamuk nab i God ago suleq helta waqauqta. Teq gamuk na in on mataw ginad meqinta wazan woqta. Teq in mataw gigo luw os wastitayaqta. Teq gamuk na in God ago dante titnonta na ago i gibilen kemaqta. ¹⁷Nazaq iyan God ago kabibiy on mataw bunmo in gamuk na wazad in God ago kabiy emgo anaghan araq ago siqim a hi iyayta. Haiqqam. In God ago kabiy dimdimunta bunmo tiqem bug daqayta.

Timoti zaway diq iyeq God ago gamuk bilaqan

4 ¹Ari God teq Krai Yesu mat on mataw tumoqiya teq a hi moqayta inaqmo gyon hazizir emdaqta amatin na inaq in ya ibiysa ya gamuk araq awaz meqinta tinignan. Ad Krai Yesu teq on mataw bunmo gimeb ulalabmo boleq ago maror og saw bunmo emid gwahtiqdaqta na ya anadin emad ya atoranmo kazaq tinibilenaiq. ²Ni on mataw God ago gamuk gibilen. In gamuk na huritnan ginad bilaqsa o haiq in gituw hiquysa ni na ago a hi bilaqad ni gibilenmo gibilen. Ad ni gamuk awaz meqintaqmo amalib gibilenad giquitil ulumsa in ginad buliyyi. Teq in daq meqinta emsa ni ginad. Ad in gidan sosil iysa ni zaway neg. Tuteqmo ni God ago suleq gibilenad ni in gigo afaqan bunmo sorad nituw hi hiquyan. ³Na ezaqgo kam araq meqinta nawa tubolaq. Kam na bo tugwahtiqid teq mataw in suleq dimunta huritnan ginad a hi bilaqdaq. In gamuk gidek siriraqta naqmo huritnan ginad bilaqsa in mataw ta asor gihureqid in bo suleq in ginad usaqta naqmo bilaqsa in tuhurit daqayta. ⁴Ad in gamuk helta na huritnan gituw hiquysa in gihol buliyeq dante haresmo muzad in wagam samanta alulin haiqta naqmo huritnan gidek tiqem daqay. ⁵Ari ninmo teq worworeqmo osad mataw afaqan nigsa ni sorad nituw hi hiquyan. Ad ni on mataw God ago gamuk dimunta gibilenad ni kabiy God nigta naqmo ni em bug.

Pol moqdaqta akaman sinsin tiqiy

⁶Ari mataw ya inol em daqayta na sinsin tiqiy. Inol emid ya inedan bilaqne mataw wain ayun tamaz emim God anognib wazbalan woqta

nazaq nog tiqiydaq. ⁷Ya God ago bab nenaq an wolad ya wagay dimunta nab iwaz meqniyim titur. Ad God yaqmen tow amta nab ya sibim le tugwahtiy. Teq ya God ago suleq helta na waz naqmo hiqiyad ya in anad tumuzin bug. ⁸Muran mat sibim le towub gwahtiqaqta na ago balaw dimunta gifaqinib emayta na in ya ibaq tunim usaq. Balaw na in kazaq. Iyahta teq ya inan mat titnonta haqid ya ibin nazaqmo iholib tuqus tutdaq. Iyahta daq titnontaqmo amalib on mataw gigo daq ulum kemaqta. Ad in hazizir ayahta emdaqta akaman nab teq in naw na tiyagdaq. Teq in ya imomo naw na a hi yagdaq. Haiqqam. On mataw ginad emay, Iyahta hidmo bolan haqad gihol husisiqsa osayta na bunmo inaqmo in God abenab naw dimunta na tuwaq daqaymo.

Timoti in Pol ago hib hidmo bolan

⁹Timoti, ni agudan hi emad hid naqmo yaqgo hib bol. ¹⁰Na ezaqgo Demas in og ka ago nagah anan moqad in ya ihulosim uliq Tesalonaika-ib tilah. Teq Kresens saw Galesiya-ib lehsa Taitus saw Dalmesiya-ib tilahmo. ¹¹Sa Luk amomo ya inaq kawa osauq. Nazaq iyan ni bolad teq ni Mak waqeq inaq bol. In mat dimunta iyim in ya kabiyab tiqilumsihdaqta. ¹²Teq ya Tikikus eman Efesus-ib lahta.

¹³Ni bolnan teq uliq Trowas-ib ni le Karpus ago bitab yaqgo iholsihen sisaqta ya hulosan nawa usaqta na ni waqeq teq a bol. Ad ni yaqgo buk giwaqmo. Giwaqad buk karuw asanib giqemiya na ni inaqmo giwaq ton. Buk naqmo ya ahol waqnan inad bilaqta.

¹⁴Aleksanda mat ain akabiyen emaqta na in ya imeqin diq tonta. Abeb teq Iyahta in ago daq na amenin tuqugdaq. ¹⁵Ni mat na ago nihol waz. In God ago gamuk i bilaquqta na ababunmo diq.

¹⁶Ya ime amebta hazizirib gamuk amenin emad tursa mat araq ya ibunib turad gamukib a hi ilumsih. Haiqqam. Mataw bunmo tiqihulos yagiy. Teq ya God bulonaiq, Mataw ya ihulosiyta na gigo daq meqinta na ni walemad anadin ta hi em haqaiq. ¹⁷Ari ya hazizirib tursa Iyahtaqmo ibiy muzad zaway yagyaq, ya in ago gamuk dimunta bilaq sireqsa on mataw en ta asor Juda a haiqta na tuhurit daqay haqad. In nazaq ilumsihim in laiyon ateb iwaqan ya afaqan araq a hi way. ¹⁸Ad nazaqmo muran teq abeb mat nog imeqin tonnan tona Iyahta ilumsihid ya dimunmo tuqosdaiq. Oseq yaqgo kam tugwahtiqid nab teq in ya iwaqeq iqad ago sawab lehid ya in ago maror aduganib dimunmo tuqosdaiq. Nazaq iyan i bunmo tuteqmo Iyahta amomo abin wazid eraqsa osuq! Hel diqtaqmo.

¹⁹Ari ni Prisila aduw Akwila inaq teq Onesiforus asenlulniz na bunmo yaqgo zeq dimun neg. ²⁰Ya Erastus uliq Korin-ib hulosan osaq. Ari Trofimus ago moq inaq iyan ya Miletus-ib hulosan towa osaq. ²¹Ni agudan hi emad hidmo bol. Luweq ni tim meqinta amuditqanta na anobun qwaydaq.

Yubulus teq Pudens teq Linus teq Klodiya teq ni nimaqbaban Krai
aduganibta na bunmo in gigo zeq dimun ninmen eman nawa lah.

²²Iyahta ni niwamuzad ninaq osan.

Ari God agem dimunta ne bunmo negsa ne osiy. Nawaqmo.